

10 DAYS OF PRAYER

WWW.TENDAYSOFPRAAYER.ORG

Endagiriro y'Omukulembeze: Okuddayo ku Kyoto

Oyanirizibwa mu Nnaku Ekkumi ez'Okusaba eza 2023! Tukikkiriza nti okusaba ly'ezzaaliro ly'okudda obuggya. Katonda akoze eby'amagero bingi mu myaka egiyise nga tumunoonyeza wamu mu kusaba n'okusiiiba. Omwoyo Omutukuvu aleeseewo okukyuusibwa, okwagala okubunyisa enjiri, ekanisa ezizziddwa ibugya, wamu n'enkolagana ezijjanjabiddwa.

Eddoboozi lya Katonda libaddenga likuyita okudda obuggya? Bayibuli ejjudde ebisuubizo gy'oli:

“Abantu bange abatumiddwa erinnya lyange bwe baneetaowazanga ne basaba ne banoonya amaaso gange ne bakyuka okuleka amakubo gaabwe amabi; kale naawuliranga nga nnyima mu ggulu ne nsonyiwa okwonoona kwabwe ne mponya ensi yaabwe” (2 Ebyomumirembe 7:14).

“Era mulinnoonya ne mundaba, bwe mulinkenneya n'omutima gwammwe gwonna” (Yeremiya 29:13).

“Awo olulituuka buli alisaba erinnya lya Mukama alirokoka” (Yoweeri 2:32).

“Musemberenga Katonda, naye anaabasembereranga mmwe” (Yakobo 4:8).

“Laba, nnyimiridde ku luggi, nneeyanjula: omuntu yenna bw'awulira eddoboozi lyange, n'aggulawo oluggi, nnaayingira gy'ali, era nnaaliira wamu naye, naye nange” (Okubikkulirwa 3:20).

Wonna w'oli mu ssaawa eno, Katonda ali kumpi nnyo okusinga bw'oyinza okukirowooza. Ayagala okugonnomola emikisa Gye ku maka go, ekanisa yo, ekitundu mw'oli, n'ensi mw'obeera. Twegatteko mu kwanukulira okuyita kwa bamalayika abasatu mu nsonga y'okusaba.

Ensonga ez'Okutunuulira mu Nnaku Ekkumi ez'Okusaba

Endagiriro z'Okusaba Buli Lunaku

Tutegeseewo endagiriro y'okusaba eya buli lunaku mu nnaku ekkumi. Buli ndagiriro erimu Ebyawandiikibwa bya Bayibuli, obubaka obw'okwewonga, okusaba okuyita mu bigambo bya Bayibuli, ebirowoozo ku kusaba, awamu n'ebirowoozo ku nnyimba. Tubaweerera amagezi nti mweyambise endagiriro eza buli lunaku olwo nno buli eyetabamu asobole okubeerako ne ky'agoberera mu kiseera eky'okusaba.

Amakanisa okwetoola ensi yonna gajja kwegattira wamu mu kusabira ensonga eya buli lunaku. Zeegatteko mu kusaba okuyita mu Byawandiikibwa n'ebiweerebbwaayo okusabira, wabula temukitwaala nti mulina okuyita mu lukalala lwonna olw'ebirowoozo ku kusaba. Muyinza okwagala okwegabanyamu mu bubondo obutonotono awamu n'okuganya buli kabondo okubeerako n'ensonga ez'okusabira.

Twagasseeko n'ekiwandiiko ekiyitibwa Ensonga ez'okusabira Mu Kkanisa Yonna (World Church Prayer Requests). Kikulu nnyo okusabira awamu ku lw'amaka ag'ekkanisa yaffe mu nsi yonna, wabula musobola okwagala okwongeramu obudde nga musabira ebyetaago by'omu kitundu kasita akabondo kammwe kabeeramu abagenyi okuva mu kitundu. Musabire engeri gye musobola okwanirizaamu abagenyi awamu n'okubaleetera okuwulira nga bali kitundu ku kabondo.

Ebirowoozo Ku Budde Bw'okusaba

Mufube okulaba nga ekiseera ky'okusaba kyangu olw'okusobozesa akabondo okuteeka essira ku kusabira ddala. Obudde bwa buli kusaba bujja kusinziira, wabula endagiri eno wammanga nkulu:

- **Okwaniriza n'okwanjula:** Eddakiika 2 – 5
- **Eky'okuyiga (mu ndagiri ey'okusaba kw'olunaku):** Eddakiika 5
- **Okusaba okuyita mu Byawandiikibwa (mu ndagiri ey'okusaba kw'olunaku):** Eddakiika 10 – 15.
- **Musabire ensonga eziri mu “Ebirowoozo Ebirala ku Kusaba” (mu ndagiri ey'okusaba kw'olunaku):** Eddakiika 20 – 30.
- **Okwanukula mu nnyimba n'okutendereza:** Eddakiika 5 – 10.

Okusabira Abalala

Buli mukkiriza akubirizibwa okubeerako abantu bataano ku musanvu (5 – 7) Katonda baamuwadde mu bulamu bwe okubasabiranga obutayosa. Bano mwemuli ab'enjaanda, ab'emikwano, bakozi bannaffe, baliraanwa, oba abalala bonna betumanyi. Mukubirizibwa okusaba Omwoyo Omutukuvu okubalunganyama mu kulondawo amannya awamu n'okutuuka ku bantu bano okuyita mu nnaku ekkumi. Muyinza okwagala okubakolera obwapa (cards) oba obupapula okusobola okuwandiikibwa amannya agajja okusabirwanga.

Obuweereza Bwa Ssabbiiti Mu Kiseera eky'Ennaku Ekkumi

Mubeereko n'awokuteeka essira mu kusaba awamu n'okugabana obujulirwa obw'essaala ezaanukulibbwa mu buweereza bw'ekkanisa ku nnaku za Ssabbiiti zombi. Mubeere batetenkanya – waliwo engeri nnyingi ez'okugabanira awamu mu kkanisa ku ebyo ebigenda mu maaso buli lunaku mu nsisinkano ez'okusaba.

Ekijaguzo Kya Ssabbiiti Esembayo

Ssabbiiti esembayo esaana okutegekebwa nga kiseera kya kujaguzo okw'amaanyi olw'ebyo byonna Katonda by'akoze okuyita mu nnaku ekkumi. Ka wabeerewo obudde obumala nga bwa kuwaayo bujulirwa olw'essaala eziddiddwaamu, okuyigiriza kwa Bayibuli/okubuulira ku kusaba, wamu n'okuyimba. Abakunjaanye bonna ka bakulemberweemu mu kusaba, abatasobodde kukwenyigiramu buli lunaku nabo bafune omukisa ogw'okuwulira essanyu eriri mu kusabira awamu n'abalala. Tubasab mutunule ku ndagiri y'ebirowoozo bya Ssabbiiti ey'Okujaguzo.

Obujulirwa

Tubasa mugabanire wamu naffe ku ngeri Katonda gy’akozeemu okuyita mu Nnaku Ekkumi ez’Okusaba! Emboozi zammwe zijja kuzzaamu abantu bangi amaanyi. Obujulirwa busobola okusindikibwa ku mutimbagano nga oyita ku www.tendaysofprayer.org.

Ennyingo z’Okusaba okw’Awamu

Mukkaanyize Wamu

Omuntu bw’awaayo ensonga ey’okusabira mu maaso ga Katonda, beera mukakafu nti waliwo abalala abasabira ensonga y’emu era mukkaanyize wamu – kino ky’amaanyi nnyo! Tokirowooza nti olw’okubanga waliwo asabidde ensonga eyo, mpaawo mulala yetaaga kugisabira. “Nate mbagamba nti Oba bannammwe babiri bwe beetabang ku nsi buli kigambo kyonna kye balisaba, kiribakolerwa Kitange ali mu ggulu” (Matayo 18:19). Nga kizzaamu nnyo amaanyi okubeera nga tusitulibwa mu kusaba!

Okukaayanira Ebisuubizo Bya Katonda

Mukubirize akabondo okukaayanira ebisuubizo bya Katonda nga kasaba. Kyangu nnyo essira okuliteeka ku bizibu byaffe, wabula bwe tukaayanira ebisuubizo bya Katonda, okukkiriza kwaffe kweyongera awamu n’okwejjukanya nti mpaawo kirema Mukama. Ebisuubizo bituyamba okuggya amaaso gaffe ku bunafu n’obuzibu ebitulimu ne tugazza ku Yesu. Wakati mu bunafu bwonna n’olutalo, Bayibuli etuwadde ebisuubizo eby’okukaayanira. Abantu ka bakubirizibwe okunoonya ebisuubizo ebisingawo awamu n’okubiwandiika basobole okubikaayanira gye bujja.

Okusiiba

Kubiriza bonna abanaabegattako mu Nnaku Ekkumi ez’Okusaba okubeerako n’engeri ey’okusiiba, nga okusiiba okulaba TV, ennyimba ezitali za Katonda, firimu/obuzannyo, omutimbagano, ebiwoomerera, oba emmere ey’ekika kyonna enzibu okukubibwa ssebusa. Obudde obwo obufissibwa bweyambisibwe mu kusaba n’okuyiga Bayibuliokusaba Katonda okukuyamba awamu n’ekkuŋŋaaniro okubeera muli bajjuvu mu Kristo. Bwe tulya mu ngeri ennyangu, tuganya ebirowoozo byaffe okwanguyirwa mu kwaniriza eddoozi erya Mwoyo Omutukuvu.

Omwoyo Omutukuvu

Mukakase nti musaba Omwoyo Omutukuvu okubalaga eby’okusabira mu bulamu bw’omuntu oba embeera ey’obwebange. Bayibuli etuyigiriza nti tetumanyi kya kusabira era nti Omwoyo Omutukuvu y’ayimirirawo ku lwaffe.

“Tetulina kukoma ku kusabira mu linnya lya Kristo, wabula n’olw’okulungamizibwa okwa Mwoyo Omutukuvu. Kino ky’ekinnyonyola okutegeezebwa kw’ebigambo bino nti Omwoyo ‘yennyini atuwolereza n’okusinda okutayogerekeka’ (Abaluumi 8:26). Okusaba okw’engeri nga eyo Katonda asanyukira okukwanukula. Bwe tunyiikirira okusaba n’obwesimbu mu linnya lya Kristo, omwo mwennyini mwemuli obweyamo bwa Katonda obw’okwanukula essaala zaffe ‘okusingira ddala byonna bye tusaba oba bye tulowooza’ (Abaepees 3:20).” (*Christ’s Object Lessons*, p. 147, n’okukkaatirizibwa).

Okuwandiikibwa kw'Essaala

Okukola kino mu biseera eby'Ennaku Ekkumi ez'Okusaba kisobola okuyamba abakkiriza okwongera okunnyikira mu miramwa gy'okusaba, okukola okwewaayo okunyweevu eri Katonda, n'okusiima emikisa Gye. Okuwandiika essaala zaffe n'okukuuma bwiino w'okwanukula kwa Katonda y'emu ku nkola ezizzaamu amaanyi.

Bwe mubeera mwagadde, musobola okutegekawo obudde mu kiseera ky'okusaba ng'abantu babweyambisa mu kuwandiika okwanukula kwabwe eri Katonda mu kyaama. Oba, wasobola okubeerawo obuwandiike obw'akabondo nga bwa ssaala n'okwanukula – mu katabo, ku lupapula olunene, oba ku mutimbagano. Kinyuma nnyo era kizimba okukkiriza bwe tubeera n'enkola ey'okutunula emabega ne tulaba butya Katonda bw'ayanukudde essaala zaffe!

Okusinza

Mukubirize era muteekeewo endowooza ey'okusinza. Tuli mu maaso g'ennyumba ya nnamulondo ya Kabaka w'obwengula. Tetulina kulagajjalira mu kiseera kino eky'okusaba nga tweyisa nga bwe tusanze. Wabula kino tekitegeeza kufukamira olutatadde. Oyagala abantu okuwulira obulungi okumala essaawa nnamba, n'olw'ekyo bakubirize okufukamira oba okutuula oba okuyimirira nga Katonda bw'alunnamizza era nga bwe bawulira bwe kisaanye.

Ennyiriri z'Essaala

Essaala zirina okubeera nga nnyimpi era nga zituukira ku nsonga. Kino kiwa n'abalala omwaganya ogw'okusaba. Mufube okulaba nga essaala zibeera za bigambo bitonotono. Buli muntu asobola okusaba emirundi egisoba mu gumu. Essaala ennyimpi zinyumisa nnyo ekiseera eky'okusaba era ne zireetera Omwoyo Omutukuvu okuyamba akabondo ku ngeri ey'okusabamu. Temulina kutandika na kufundikira ssaala nnyimpi n'ebigambo nti, “Ai Katonda” oba “Amiina.” Wabula erina kusigala nga mboozi egenda mu maaso ne Katonda.

Akasiriikiriro

Nga omukulembeze, tewefuga budde bwa kusaba bwonna. Ensonga enkulu eri mu kusobozesa abalala okusaba. Ebiseera by'akasiriikiriro bisanyusa nnyo, kubanga biwa Katonda omwagaanya okwogera mu mitima gyaffe. Mukkirize Omwoyo Omutukuvu okukola n'okuwa buli omu obudde bw'okusaba.

Okuyimba

Ennyimba ez'omuddirinjjanwa mu kabondo nga ziyimbibwa wakati mu kusaba, zoongera ku bunyunyuntuvu bw'ensisinkano y'okusaba. Ebirowoozo ku nnyimba biweereddwa wansi wa buli ndagiriro ey'olunaku. Temukitwaala nti ennyimba zonna muteekeddwa okuziyimba – bino bikoma ku kubeera birowoozo. Okuyimba era kukola bulungi mu kuva mu ssaawa ey'okusaba okudda mu ndala.

Okuleeta Eby'okusabirako

Tosaba bantu bali mu kabondo kuleeta nsonga ez'okusabirako, wabula kubiriza abantu okusabira ensonga zaabwe awamu n'okuzzaamu abalala amaanyi okukkiriziganya n'okusabira ensonga ezo. Ensonga eri emabega wa kino, bwe budde! Bwe musalawo okuleeta eby'okusabirako, kibeera kijja kutwaala obudde bwammwe buwanvu obw'okusaba. Setaani yewuunya nnyo nga tumalira ebiseera byaffe mu kwogera ku bizibu, mu kifo eky'okubisabira. Abali mu kabondo bajja kutandiikiriza ensonga y'okubudaabuda n'okuwa eddagala ku buzibu. Amaanyi gava wa Katonda! Gye tukoma okusoma, n'amaanyi Ge gye gajja okukoma okutuweebwa.

Ebiseera Byo Ebya Buli Lunaku

Kino kikulu nnyo! Buli mukulembeze asaanye aweeyo obudde buli lunaku ng'ali ku bigere bya Yesu, ng'ayogera naye awamu n'okusoma Ekigambo Kye. Buli lw'onoteeka okumanya Katonda mu kifo ekisooka mu bulamu bwo, kijja kuggulirawo embeera ennungigy'oli. "Amaanyi agaanyenya ensi mu Kudda Obuggya Okw'amaanyi gaava mu kifo eky'ekyaama eky'okusaba. Eyo mu bukkakamu obutukuvu abaweereza ba Mukama gye baateeka ebigere byabwe ku lwazi olw'ebisuubizo Byo" (The Great Controversy, pg. 210). Omukulembeze kasita asaba, Katonda akola ku mitima gy'abantu.